
**ԱՊՀ ԵՐԿՐՆԵՐԻ ԱՊՐԱՆՔԱՅԻՆ ՇՈՒԿԱՆԵՐՈՒՄ
ՖԻՐՄԱՆԵՐԻ ԳԵՐԻՇԽՈՂ ԴԻՐՔԻ ԿԱՐԳԱՎՈՐՈՒՄԸ**

ՄԻՔՍԱՅԵԼՅԱՆ Գ. Մ.

Շուկաների կառուցվածքին առնչվող տնտեսագիտական գրականության մեջ, ինչպես նաև ապրանքային շուկաների վերլուծության ժամանակ հաճախակի է օգտագործվում «գերիշխող դիրք» հասկացությունը: Դա բնութագրում է շուկայում ֆիրմայի այնպիսի շուկայական իշխանություն, որը մրցակիցներին և սպառողներին կամ ապրանքատերերին շուկայական պայմաններ թելադրելու հնարավորություն է տալիս: Իսկ շուկայական իշխանությունը վաճառողի կամ գնորդի՝ ապրանքի գնի վրա ազդելու ունակությունն է¹:

Տարբեր երկրների մրցակցային օրենսդրություններում ապրանքային շուկաներում գերիշխող դիրքը որոշելիս հաճախ մոտենում են երկու չափանիշով՝ մենաշնորհ գործունեությամբ և շուկայի կառուցվածքով: Անկախ նրանից, թե որ չափանիշն է դրված գերիշխող դիրքի որոշման հիմքում, դրա բնութագրման ժամանակ օգտագործվում են քանակական և որակական ցուցանիշներ: Հարկավոր է նկատի ունենալ, որ Եվրոպայի շատ երկրներում իրավաբանները և տնտեսագետները գերիշխող դիրքը միատեսակ բնութագրող քանակական և որակական ցուցանիշներ են մշակել, որը թույլ է տալիս միասնականացնել գործող օրենսդրությունները²:

ԱՊՀ երկրների մրցակցային օրենսդրության ուսումնասիրությունը ցույց է տալիս, որ դրանց մի մասում գերիշխող դիրքը որոշվում է միայն քանակական ցուցանիշներով (Ադրբեջանի, Հայաստանի³, Մոլդովայի, Ղազախստանի, Ղրղզստանի և Վրաստանի Հանրապետություններում)⁴,

¹ Stigler *Микроэкономика* (под общ. ред. д.э.н., профессора А. В. Сидоровича), М., 2002, с. 120; Пиндайк Р., Рабинфельд Д., *Микроэкономика* (пер. с англ.), СПб., 2002, с. 298.

² Князева И. В., *Антимонопольная политика в России*, М., 2006, с. 225.

³ Մինչև 2007 թ. փետրվարի 22-ին օրենքում կատարված փոփոխությունները շուկայում տնտեսվարող սուբյեկտի գերիշխող դիրքը որոշելիս Հայաստանի օրենսդրությամբ հնարավոր էր քանակական ցուցանիշներին զուգահեռ որակական պարամետրեր կիրառել:

⁴ Закон "Об антимонопольной деятельности", 15.XII.1998, N 590-ІІ (Азербайджан., 19.III.1999, N 62); Закон Грузии "О монополистической деятельности и конкуренции", 25.VI.1996, N 288-Іс; Закон Кыргызской Республики "Об ограничении монополистической деятельности, развитии и защите конкуренции" (Введен в действие от 15.IV.1994, N 1488-ХІІ) (Ведомости Жогорку Кенеша Кыргызской Республики, 1994, N 5, с. 163); Принят Законодательным собранием Жогорку Кенеша Кыргызской Республики, 26.XI.1998; Закон Республики Казахстан "О конкуренции и ограничении монополистической деятельности", 7.VII. 2006, N 173-ІІІ ЗРК; Закон Республики Молдова "О защите конкуренции", 30.VI. 2000, N 1103-ХІV.

մյուսում՝ և քանակական, և որակական ցուցանիշներով (Բելոռուսի, Տաջիկստանի⁵, Ուզբեկստանի և Ուկրաինայի Հանրապետություններում, Ռուսաստանի Դաշնությունում)⁶: Ուզբեկստանի օրենսդրությամբ, շուկայում 65 և ավել տոկոս բաժին ունեցող սուբյեկտը համարվում է գերիշխող դիրք ունեցող, իսկ 35-65% միջակայքում բաժին ունեցող սուբյեկտը կհամարվի գերիշխող դիրք ունեցող, եթե կարգավորող մարմինը, շուկայում ունեցած սուբյեկտի բաժնի կայունությունից, մրցակիցներին պատկանող բաժինների հարաբերական չափերից և որակական այլ չափանիշներից ելնելով, նրան կգնահատի որպես գերիշխող դիրք ունեցող:

Տաջիկստանի օրենսդրությամբ, շուկայում 65 և ավել տոկոս բաժին ունեցող տնտեսվարող սուբյեկտը համարվում է գերիշխող դիրք ունեցող, բացառությամբ այն դեպքերի, երբ, կապացուցի, որ, չնայած 65 և ավել տոկոս բաժին ունենալու հանգամանքին, շուկայի վրա ազդելու հնարավորությունները սահմանափակ են: Շուկայում 35-65% բաժին ունեցող սուբյեկտը կհամարվի գերիշխող դիրք ունեցող, եթե կարգավորող մարմինը կհիմնավորի, որ սուբյեկտն ունի շուկայի վրա ազդելու իրական հնարավորություններ: Շուկայում 35%-ից ցածր բաժին ունեցող սուբյեկտը չի համարվի գերիշխող դիրք ունեցող⁷:

Ռուսաստանի Դաշնության մրցակցային գործող օրենսդրությամբ, ապրանքային շուկայում 50%-ից ավել բաժին ունեցող տնտեսվարող սուբյեկտը համարվում է գերիշխող դիրք ունեցող, եթե հակամենաշնորհային օրենսդրության խախտման գործերի քննարկման կամ տնտեսական համակենտրոնացումների նկատմամբ հսկողության սահմանման դեպքում չի պարզվի, որ, չնայած նշված սահմանագծի գերազանցմանը, տնտեսվարող սուբյեկտի դիրքը չի կարող լինել գերիշխող: Շուկայում 35-50% բաժին ունեցող սուբյեկտը կարգավորող պետական մարմնի կողմից կհամարվի գերիշխող դիրք ունեցող՝ ելնելով ապրանքային շուկայում մրցակիցների բաժինների հարաբերական չափերի համեմատ տնտեսվարող սուբյեկտի բաժնի անփոփոխ լինելուց կամ աննշան փոփոխությունից

կամ

էլ

այլ

⁵ Նախկին օրենքով, Տաջիկստանում առաջնորդվում էին միայն որակական ցուցանիշներով (տե՛ս *Закон Республики Таджикистан "Об ограничении монополистической деятельности и развитии конкуренции"*, 13.XII.1997, N 525). Լրաբեր 3-8

⁶ *Закон Республики Беларусь "О противодействии монополистической деятельности и развитии конкуренции"*, от 10.XII. 1992, N 2034-XII. В редакции Закона от 10.I.2000, N 364-3 (Национальный реестр правовых актов Республики Беларусь, 2000, N 8, 2/139); *Федеральный закон РФ 135-ФЗ "О защите конкуренции"* (Российская газета, 27.YII.2006); *Закон Республики Узбекистан "О конкуренции и ограничении монополистической деятельности на товарных рынках"*, 27.XII.1996, N 355-I; *Закон Республики Узбекистан N 832-I от 20.YIII.1999; Постановление Олий Мажлиса Республики Узбекистан N 356-I от 27.XII.1996. "О введении в действие Закона Республики Узбекистан "О конкуренции и ограничении монополистической деятельности на товарных рынках"*, 27.XII.1996, N 355-I; *Закон Республики Таджикистан "О конкуренции и ограничении монополистической деятельности на товарных рынках"*, 29.XI.2000, N 11.

⁷ Մինչև 2006 թ. հոկտեմբերի 26-ը Ռուսաստանի Դաշնության մրցակցային օրենսդրությամբ գերիշխող դիրքի որակման նույն չափանիշներն էին դրված:

չափանիշներից: Շուկայում 35%-ից ցածր բաժին ունեցող սուբյեկտը, բացառությամբ ֆինանսական շուկաների, չի համարվի գերիշխող դիրք ունեցող, բացառությամբ օրենքով սահմանված, ինչպես նաև համատեղ գերիշխելու դեպքերի:

Ուկրաինայի օրենսդրությամբ, սուբյեկտը ապրանքային շուկայում ունի գերիշխող դիրք, եթե չունի մրցակից կամ չի հանդիպում էական մրցակցության՝ շուկայի մուտքի խոչընդոտների առկայության պայմաններում, շուկայում 35%-ից ավել բաժին ունենալու դեպքում, եթե չի հիմնավորի, որ հանդիպում է նշանակալից մրցակցության, կամ շուկայում ունի 35% և պակաս բաժին, եթե չի հանդիպում էական մրցակցության, մասնավորապես, մրցակիցների համեմատաբար ոչ մեծ բաժինների պարագայում, ինչպես նաև համատեղ գերիշխելու դեպքում:

Ղազախստանի օրենսդրությամբ՝ շուկայում 35 և ավել տոկոս բաժին ունեցող սուբյեկտը համարվում է գերիշխող դիրք ունեցող, Ղրղզստանի օրենսդրությամբ՝ առնվազն 35% բաժին ունեցող կամ յուրաքանչյուր տարի կարգավորողի սահմանած մեծությունը գերազանցող սուբյեկտը: Բելոռուսի օրենսդրությամբ՝ եթե սուբյեկտի բաժինը գերազանցում է կարգավորող մարմնի սահմանած մեծությունը կամ չի գերազանցում այդ մեծությունը, բայց ելնելով շուկայում սուբյեկտի ունեցած բաժնի կայունությունից, մրցակիցներին պատկանող բաժինների հարաբերական չափերից և այլ չափանիշներից՝ կարգավորողը նրան որակում է իբրև գերիշխող դիրք ունեցող:

Որոշ երկրներում ապրանքային շուկաների գերիշխող դիրքի սահմանային չափը որոշում է կարգավորող մարմինը (Բելոռուսի և Վրաստանի հանրապետություններ), մյուսներում օրենքով է նախատեսված:

Մի շարք երկրների օրենսդրություններում, հակամրցակցային համաձայնությունները սահմանափակելու, ինչպես նաև խոշոր ֆիրմաների գործողությունները տեսադաշտում պահելու նպատակով, ամրագրված է համատեղ գերիշխելու դրույթ (Բելոռուսի, Ղազախստանի, Հայաստանի, Ուկրաինայի Հանրապետություններում և Ռուսաստանի Դաշնությունում): Ղազախստանի Հանրապետության և Ռուսաստանի Դաշնության օրենսդրություններում համատեղ գերիշխող մասնակիցների նկատմամբ նախատեսված է նվազագույն շեմի դրույթ, որից ցածր բաժին ունենալու դեպքում սուբյեկտը չի կարող գերիշխող դիրք ունեցող համարվել: Ղազախստանի օրենսդրությամբ, նվազագույն շեմը 15%-ից ցածր բաժին ունենալն է, իսկ Ռուսաստանի Դաշնության օրենսդրությամբ՝ 8%-ից: Բելոռուսի և Ուկրաինայի պարագայում կարգավորող մարմինն է որոշում համատեղ գերիշխող դիրք ունեցող սուբյեկտների նվազագույն շեմը՝ կախված դրանց միջև մրցակցության առկայությունից: Հայաստանում օրենքի փոփոխությունից հետո համատեղ գերիշխելու դրույթի ամրագրումը ստորին շեմի սահման չի նախատեսում⁸: Մասնավորապես, օրենքի 6-րդ հոդվածի 3-րդ և 4-րդ մասերով համատեղ գերիշխելու դրույթներ են նախատեսվել համապատասխանաբար՝ երկու և երեք տնտեսվարող

⁸ Տե՛ս ««Տնտեսական մրցակցության պաշտպանության մասին» ՀՀ օրենքում լրացումներ և փոփոխություններ կատարելու մասին» ՀՀ օրենքը [ՀՀՊՏ, 2007, N 18 (542)]:

սուբյեկտների համար. եթե առաջին դեպքում երկու սուբյեկտների համատեղ բաժինը առնվազն մեկ երկրորդ է, երկրորդ դեպքում՝ երեք սուբյեկտներին՝ առնվազն երկու երրորդ: Նման պարագայում նույնիսկ շուկայում 3-4% բաժին ունեցող սուբյեկտը կարող է գերիշխող դիրք ունեցող համարվել (օրինակ, եթե առաջին երեք խոշոր սուբյեկտները շուկայում ունեն համապատասխանաբար՝ 32, 32 և 3% բաժին): Նշված բացը մասամբ լրացնելու միտումով ապրանքային շուկայում գերիշխող դիրքի որոշման դեպքում կարգավորող մարմինը ենթաօրենսդրական ակտով (այսուհետև՝ Կարգ) որոշակի սահմանափակումներ է մտցրել⁹: Եթե օրենքը թույլատրում է վերոհիշյալ օրինակում բերված երեք սուբյեկտներին էլ գերիշխող համարել, ապա, Կարգի համաձայն, համատեղ գերիշխող կճանաչվեն առաջին երկու սուբյեկտները¹⁰:

ԱՊՀ երկրների զգալի մասում որպես գերիշխող դիրքի չարաշահման չափանիշ են ամրագրված մրցակցության սահմանափակումը և սպառողների, այդ թվում՝ ֆիզիկական անձանց, շահերի ոտնահարումը: Ուզբեկստանի և Տաջիկստանի Հանրապետությունների մրցակցային օրենսդրություններով, գերիշխող դիրքի չարաշահման չափանիշը մրցակցության սահմանափակումն է կամ այլ տնտեսվարողների շահերի ոտնահարումը: Այդ առումով խոսք չկա ֆիզիկական անձանց շահերի ոտնահարման մասին:

Մի շարք երկրներում ապրանքային շուկաների գերիշխող դիրք ունեցող տնտեսվարող սուբյեկտների գրանցամատյան (ռեեստր) են վարում: Կարգավորողի կողմից ֆիրմաների գրանցումը ռեեստրում հնարավորություն է տալիս վերահսկողություն սահմանել տնտեսական համակենտրոնացումների նկատմամբ¹¹: Գերիշխող ֆիրմաների գրանցամատյանի առկայությունը կարգավորող մարմնին հնարավորություն է տալիս դրանց որոշակի գործողությունների նկատմամբ հսկողություն սահմանել, միաժամանակ, տեսադաշտում պահելով նման սուբյեկտներին՝ դրանցից պարբերաբար տեղեկատվություն ստանալ: Եթե զարգացած երկրներում կարգավորող մարմինները գրանցամատյանի վարման գործառույթ չեն իրականացնում, քանի որ նման սուբյեկտների նկատմամբ վերահսկողություն սահմանելու լայն հնարավորություններ ունեն, ապա ԱՊՀ որոշ երկրներում (Բելոռուսի, Հայաստանի, Ղազախստանի, Ղրղզստանի, Ուզբեկստանի հանրապետություններում և Ռուսաստանի Դաշնությունում) վերահսկողության նման գործառույթ օգտագործում են վերահսկողության մեխանիզմների սահմանափակության պատճառով: Սակայն վերահսկողության այդ գործիքը միշտ չէ, որ արդյունավետ է կիրառվում: Ըստ տնտեսական համագործակցության և զարգացման կազմակերպությանն (OECD) առընթեր ֆինանսական և գործնական հարաբերությունների

⁹ Տե՛ս «Տնտեսվարող սուբյեկտի մենաշնորհի կամ գերիշխող դիրքի որոշման կարգը» [Գերատեսչական նորմատիվ ակտերի տեղեկագիր, 1.XI.2007, N 29 (269)]:

¹⁰ Եթե գերիշխող դիրքի որակման՝ օրենքով նախատեսված չափանիշներին միաժամանակ համապատասխանում են շատ և քիչ թվով սուբյեկտներ, ապա, Կարգի համաձայն, որպես չափանիշ ընտրվում է ավելի քիչ թվով սուբյեկտների համատեղ բաժինը:

¹¹ Միքայելյան Մ. Վ., Տնտեսական մրցակցության և մենաշնորհների պնտական կարգավորման հիմնահարցերը Հայաստանի Հանրապետությունում, Ե., 2005, էջ 171:

բաժնի խորհրդատու Սառա Ռեյնոլդսի, Ռուսաստանի Դաշնությունում գերիշխող ֆիրմաների ընդգրկումը ռեեստրում դրանց համար առանձնահատուկ պարտավորությունների և այլ պաշտոնական հետևանքների չի հանգեցնում¹²: Հայաստանում կարգավորող մարմինը տարեկան երկու անգամ նման սուբյեկտներից տեղեկատվություն է ստանում արտադրության ծավալների, արտադրանքի գների կամ այդ գների փոփոխությունների վերաբերյալ: Մինչդեռ տնտեսական համակենտրոնացման բացահայտումն ապահովող տեղեկատվություն գերիշխող ֆիրմաներից չի պահանջվում: Այս առումով որոշակիորեն հետաքրքիր է Ղազախստանի Հանրապետության փորձը: Մրցակցային նոր օրենքի համաձայն, ռեեստրում գրանցված տնտեսվարող սուբյեկտները պարտավոր են ապրանքների գների բարձրացումից 30 օր առաջ հակամենաշնորհային մարմնին տեղյակ պահել գների բարձրացման մասին՝ բերելով համապատասխան հիմնավորումներ դրա անհրաժեշտության վերաբերյալ:

ԱՊՀ, ինչպես նաև Եվրոմիության երկրների ապրանքային շուկաներում սուբյեկտների գերիշխող դիրքի կարգավորման գործիքներից է պատժամիջոցների ինստիտուտը (տե՛ս աղյուսակը):

Հայաստանի ապրանքային շուկաներում գերիշխող դիրք ունեցող սուբյեկտների կողմից այդ դիրքի չարաշահումների դեպքում կարգավորող մարմինը կարող է նշանակել տուգանք՝ իրավախախտման նախորդ տարվա հասույթի երկու տոկոսի չափով, բայց ոչ ավել քան 300 մլն դրամ: Մեկ տարվա ընթացքում գերիշխող դիրքը երկու և ավել անգամ չարաշահող սուբյեկտները կարող են ապախոշորացվել¹³:

Վրաստանում հակամենաշնորհային օրենսդրության խախտման համար կիրառվում են նյութական, վարչական և քրեական պատասխանատվության միջոցներ: Մասնավորապես, տնտեսվարող սուբյեկտի կողմից գերիշխող դիրքի չարաշահման դեպքում հակամենաշնորհային ծառայությունը վերջինիս կարող է պարտադրել դադարեցնել իրավախախտումը¹⁴: Հակամենաշնորհային ծառայության պահանջը չկատարելու դեպքում Վրաստանի վարչական օրենսգրքի համաձայն (հոդված 159-2), նախատեսվում է տուգանք՝ 1000-ից մինչև 3000 լարիի չափով¹⁵:

Բելոռուսի Հանրապետությունում շուկայում գերիշխող դիրք ունեցող սուբյեկտների նկատմամբ պետական հատուկ վերահսկողություն է սահմանվում ապրանքների ծավալների և որակների, գների մակարդակների և այլ ցուցանիշների վերաբերյալ: Գերիշխող դիրքի չարաշահման հետևանքով ստացված շահույթը դատարանի միջոցով ենթակա է գանձման պե-

¹² *Антимонопольное законодательство и конкурентная политика Российской Федерации. Экспертная оценка ОЭСР, 2004, с. 38.*

¹³ Նշված պատժամիջոցը կիրառվում է 2007թ. փետրվարի 22-ին Ազգային Ժողովի կողմից օրենքում կատարված փոփոխության հիման վրա: Մինչև օրենքի փոփոխությունը նման չարաշահման համար նախատեսվում էր տուգանքի նշանակում իրավախախտման ամսի մեկին նախորդող օրացուցային տարվա՝ տվյալ ապրանքատեսակի իրացումից ստացված հասույթի մեկ տոկոսի չափով:

¹⁴ *Закон Грузии “О монополистической деятельности и конкуренции”, 25. VI.1996, N 288-1с.*

¹⁵ *Общий административный кодекс Грузии, 25. VI.1999, N 2181-11с.*

տական բյուջե, իսկ այլ սուբյեկտներին հասցված վնասը ենթակա է փոխհատուցման: Հակամենաշնորհային մարմնի որոշումը կատարելուց խուսափելու, ինչպես նաև ոչ ժամանակին կատարելու համար նախատեսված է տուգանք՝ խախտմանը նախորդող տարում ստացած եկամտի մինչև 10%-ի չափով:

Աղյուսակ

ԱՊՀ մի շարք երկրներում գերիշխող դիրքի չարաշահման դեպքում կիրառվող պատժամիջոցների տեսակները

Պատժա- միջոցներ Երկրներ	Ապախո- շորա- ցում	Այլ սուբյեկտ- ների վնասի փոխհատու- ցում	Խախտումով ստացված եկամտի (շահույթի) բռնա- զանձում	Տույժ և տուգանք	
				կարաշահման համար	կարգադրությունը կատարվելու համար
1. Ադրբեջանի Հանրապետություն	+	+	+	-	+
2. Բելոռուսի Հանրապետություն	+	+	+	-	+
3. Հայաստանի Հանրապետություն	+	+	-	+	+
4. Մոլդովայի Հանրապետություն	+	+	-	+	+
5. Ղազախստանի Հանրապետություն	+	+	+	+	+
6. Ղրղզստանի Հանրապետություն	+	+	+	+	+
7. Ռուսաստանի Դաշնություն	+	+	+	+	+
8. Վրաստանի Հանրապետություն	-	+	-	+	+
9. Տաջիկստանի Հանրապետություն	+	+	-	-	+
10. Ուզբեկստանի Հանրապետություն	+	+	-	-	+
11. Ուկրաինայի Հանրապետություն	+	+	-	+	+

Ղրղզստանի մրցակցային օրենսդրության համաձայն, գերիշխող դիրքը չարաշահող սուբյեկտների նկատմամբ կիրառվում են պատասխանատվության հետևյալ միջոցները. տնտեսվարող սուբյեկտների ապախոշորացում, օրենսդրության խախտումով ստացված շահույթի բռնազանձում, հասցված վնասի փոխհատուցում և դրամական տուգանք: Տուգանքի մեծությունը կարող է լինել մինչև 5000 սումի չափով՝ տնտեսվարող սուբյեկ-

տի համար, իսկ խախտումը թույլատրող պաշտոնատար անձանց համար մինչև 3 ամսվա աշխատավարձի չափով:

Տաշիկստանում կարգավորող մարմինը (Էկոնոմիկայի նախարարությունը) իրավունք ունի ապախոշորացնել գերիշխող դիրքը չարաշահող սուբյեկտը, խախտումը դադարեցնելու, նախնական վիճակը վերականգնելու, հասցված վնասը փոխհատուցելու և տուգանելու վերաբերյալ որոշում կայացնել: Կարգավորող մարմնի որոշումները չկատարելու համար տնտեսվարող սուբյեկտները տուգանվում են նախորդ տարվա ստացած շահույթի 3-10%-ի չափով, իսկ դրանց պաշտոնատար անձինք՝ ոչ պակաս, քան նվազագույն աշխատավարձի եռակի չափով:

Ռուսաստանի Դաշնության հակամենաշնորհային օրենսդրությամբ, գերիշխող դիրքը պարբերաբար խախտող սուբյեկտները դատական կարգով ապախոշորացվում են (վարկային կազմակերպությունները՝ կենտրոնական բանկի համաձայնությամբ): Կիրառվում են նաև գերիշխող դիրքի չարաշահման հետևանքով ստացված շահույթի բռնագանձման, նման սուբյեկտներին և դրանց պաշտոնատար անձանց տուգանման պատժամիջոցներ:

Ուզբեկստանի Հանրապետության օրենսդրությամբ նախատեսվում է գերիշխող դիրքը չարաշահող սուբյեկտների նկատմամբ դատական կարգով ապախոշորացման կամ դրանից կառուցվածքային ստորաբաժանման առանձնացման վերաբերյալ որոշում կայացնել: Գերիշխող դիրքը չարաշահելու հետևանքով այլ սուբյեկտներին հասցված վնասը ենթակա է փոխհատուցման: Խախտումը վերացնելու վերաբերյալ արված կարգադրությունը չկատարելու համար իրավաբանական անձանց համար սահմանված տուգանքը նվազագույն աշխատավարձի 100-ից 500-ապատիկի չափով է, ֆիզիկական անձանց համար՝ 5-ից 7-ապատիկի չափով:

Մոլդովայի Հանրապետությունում գերիշխող դիրքը չարաշահող սուբյեկտների նկատմամբ կիրառվում են հարկադիր բաժանման, այլ սուբյեկտներին հասցված վնասի փոխհատուցման և վարչական տուգանքների նշանակման պատժամիջոցներ: Հարկադիր բաժանումն իրականացվում է գերիշխող դիրքը երկու և ավելի անգամ խախտող սուբյեկտների նկատմամբ Վարչական իրավախախտումների մասին օրենսգրքի համաձայն: Ազատ մրցակցության սահմանափակման կամ բացակայության դեպքում, գերիշխող դիրքի չարաշահում թույլ չտալու նպատակով, կառավարությունը կարող է կարգավորել տվյալ ապրանքների գները:

Ուկրաինայի մրցակցային օրենսդրության համաձայն, գերիշխող դիրքի չարաշահման համար տնտեսվարող սուբյեկտը տուգանվում է տվյալ ապրանքի իրացումից ստացված՝ նախորդ տարվա հասույթի 10%-ի չափով: Շուկայում գերիշխող դիրքը չարաշահող սուբյեկտի նկատմամբ որպես պատժամիջոց կիրառվում են նաև ոչ պակաս, քան վեց ամսվա ընթացքում դրա հարկադրական բաժանման, ինչպես նաև այլ սուբյեկտներին հասցված վնասը կրկնակի փոխհատուցելու մեխանիզմները:

Այսպիսով, ԱՊՀ երկրների հակամենաշնորհային և մրցակցային օրենսդրությունները ապրանքային շուկաներում գերիշխող դիրք ունեցող սուբյեկտների գործունեությունը կարգավորելու առումով ունեն նմանություններ և առանձնահատկություններ: Խնդիրը հնարավորության սահմաններում այդ օրենսդրությունների ներդաշնակեցումն է

Եվրոմիության արցակցային օրենսդրությանը և, սիաժամանակ, եղաժ դրական փորձը հաշվի առնելով, կարգավորման գործուն մեխանիզմների ստեղծումը:

**РЕГУЛИРОВАНИЕ ГОСПОДСТВУЮЩЕГО
ПОЛОЖЕНИЯ ФИРМ НА ТОВАРНЫХ РЫНКАХ СНГ**

МИКАЕЛЯН Г. М.

Резюме

Изучение конкурентных законодательств стран СНГ выявило ряд проблем регулирования деятельности фирм, занимающих доминирующее положение на товарных рынках. Решение проблемы сводится к возможному согласованию конкурентных законодательств стран СНГ с законодательством Евросоюза. При этом должен быть учтен положительный опыт отдельных стран с целью выработки механизмов регулирования деятельности доминирующих фирм.